

Pozita e teuhidit në jetën e muslimanit

•Teuhidi- Njeshmëria e Allahut, është themeli mbi të cilin ndërtohen veprat tona. Nuk pranohen veprat nëse personi nuk ka teuhid. Allahu nuk e pranon asnjë vepër e adhurim, përveçse atëherë kur personi i kryen ato duke e njësuar Allahun me adhurim, duke ia kushtuar veprën pastër vetëm Atij, me sinqeritet të plotë. Allahu thotë: **“ata qenë urdhëruar vetëm që të adhuronin Allahun me përkushtim të sinqertë”**. Bejjine 5. Dhe: **“Vetëm Allahut i takon adhurimi i vërtetë.”** Zumer 3.

•Teuhidi është jeta e vërtetë e muslimanit, me të cilën dallohet prej të tjerëve. Njeriu nuk ka mundësi të jetojë jetën e vërtetë përveç atëherë kur e njëson Allahun me adhurim; pra kur e kupton teuhidin, e mëson dhe e praktikon në jetën e tij, **“A barazohet i vdekuri që Ne e ngjallëm dhe i dhamë dritë me të cilën ecën midis njerëzve, me atë që është në errësirë e nuk mund të dalë prej saj?!”** Enam 122. Kur njeriut i jep Allahu teuhid e besim dhe kthehet për tek Ai me adhurim, atëherë kjo është jeta e tij e vërtetë, **“Bindjuni Allahut dhe të Dërguarit kur ju thërret drejt asaj që ju jep jetë!”** Enfal 24.

Rezultat e bekuara që dalin kur teuhidi vendoset thellë në zemrën e besimtarit:

-Veprat e tij do të llogariten të mira e të pastra tek Allahu. Veprat nuk mund të pranohen pa teuhid, janë të asgjësuar, **“Kushdo që mohon besimin, veprat e tij do të zhvlerësohen dhe në jetën tjetër ai do të jetë i dështuar.”** Maide 5. **“Me të vërtetë, të është shpallur ty (o Muhamed), si dhe atyre që kanë qenë para teje: “Nëse i shoqëron Allahut diçka tjetër (në adhurim), me siguri që punët e tua do të zhvlerësohen dhe do të jesh ndër të humburit.”** Zumer 65. Teuhidi i saktëson veprat tona, madje Allahu do të shpërblejë për to, **“Sa për atë që dëshiron botën tjetër dhe përpiket për të me gjithë shpirt e duke qenë besimtar (pra, duke pasur teuhid), përpjekja e tij do të shpërblehet.”** Isra 19.

2. Do të ketë jetë të mirë e të lumtur, e mbushur me mirësi, me rehati shpirtërore, larg brengave, vuajtjeve e dhimbjeve, **“Cilindo mashkull apo femër që kryen vepra të mira, duke qenë besimtar, Ne do ta bëjmë që të kalojë jetë të bukur dhe do ta shpërblejmë sipas veprave më të mira, që ka bërë.”** Nahl 97.

3. Do të gjejë strehë në teuhid dhe besim sa herë që goditet me sprova e fatkeqësi. Pejgamberi salAllahu alejhi ue selem ka thënë: **"Është e çuditshme çështja e besimtarit. E gjithë ajo (çdo gjendje) është mirë, dhe kjo nuk i takon askujt tjetër përveçse besimtarit.."**, besimtarit i cili ka arritur të realizojë teuhidin e Allahut, **"Nëse i vjen një e mirë, ai është mirënjohës, dhe kjo është më mirë për të. Nëse e godet një dëm e fatkeqësi, ai tregohet i durueshëm, dhe kjo është më mirë për të."** Nëse kthehem të shohim lutjet nga suneti që bëhen në gjendje shqetësimi e brengje, vërejmë se të gjitha ato kthehen te teuhidi, si: **"Allahu Allahu Rabbi, La ushriku bihi shejen -Allahu, Allahu, është Zoti im, unë nuk i shoqëroj Atij asgjë në adhurim!"** dhe të tjera.

4. Do të shpëtojë prej të keqes së shejtanit dhe të magjistarëve e fallxhorëve. Pejgamberi salAllahu alejhi ue selem ka thënë: **"Lexojeni sa më shumë suren Bekare, ngase nëse i përkushtoheni (leximit e mësimt të saj) do të keni bereqet të madh e nëse e braktisni, kjo është humbje e madhe! Magjistarët nuk kanë mundësi të të dëmtojnë përderisa e lexon atë!"** Në suren Bekare është Ajetul Kursij i cili është ajet i teuhidit, që nëse e lexon para se të bie në gjumë atëherë një engjell do të të ruajë deri në mëngjes dhe nuk lejon

të të afrohet deri në mëngjes asnjë shejtan (siç ka ardhur kjo në hadith).

5. Do të shërohet nga sëmundjet e zemrës. Përmes teuhidit do të arrijë të largojë cytjet dhe vesveset që depërtojnë në zemrën e tij. Shejtani sjell vazhdimisht cytje dhe sulmon befasisht. Qëllimi i tij është dëmtimi i zemrës së besimtarit. Shumë prej njerëzve e përjetojnë këtë gjë, kanë vesvese e cytje, të cilat e frikësojnë dhe e lodhin. Baza e këtij shërimi dhe pastrimi prej tyre është teuhidi. Në Kuran lexojmë në suren Nas: **“Thuaj: “Kërkoj mbështetje te Zoti i njerëzve, Sundimtari i njerëzve, i Adhuruari (i vetëm me të drejtë) i njerëzve, nga sherri i djallit cytës që fshihet (pasi cyt)...”** Ajetet 1-4. Këtu janë bërë bashkë tri llojet e teuhidit.

6. Do të largojë ndryshkun prej zemrës së tij. Ky ndryshk hiqet vetëm përmes teuhidit dhe kur besimtari përpiqet ta forcojë atë. Pejgamberi salAllahu alejhi ue selem ka thënë: **"Vërtet besimi vjetërsohet në zemrën e ndonjërit prej jush ashtu siç vjetërsohet rroba. Lutuni dhe kërkoni prej Allahut që t'ua përtërijë besimin në zemrat tuaja!"** Sa më shumë që njeriu përpiqet të përtërijë

besimin, pra të forcojë teuhidin, atëherë edhe zemra pastrohet prej të këqijave.

7. Do të shpëtojë prej zjarrit të xhehenemit në Ditën e Gjykimit. Nuk ka gjë që mund ta shpëtojë njeriun prej zjarrit të xhehenemit përveçse teuhidi. Prej zjarrit do të shpëtojnë vetëm ithtarët e teuhidit, realizuesit e teuhidit. Allahu thotë: **“Vërtet, Allahu nuk fal që të adhurohet dikush apo diçka tjetër veç Atij, por gjynahet e tjera më të vogla ia fal kujt të dojë.”** Nisa 48.

Hoxhë Lulzim Perçuku – Dersi “Pozita e teuhidit në jetën e muslimanit”.